

**Naqqiut:**

Saqqummiussissut 16. januaari 2015-meersoq taarserpaa  
(Iluarsartuullugu pilersaarussiaq ataavartumik ineriartortuarpoq – annermik killiffiusumi matumani aningaasalersuinissap inissinneqarnissaata aallartinneqarnerani, iluarsartuullugu pilersaarussiaq uummaarissumik ingerlanneqarnerani aaqqiissuteqartoqartarpoq. Taamaattumik suliap ineriartornerani killiffiusumi kingullermi paasissutissat nutaat takkuttut malillugit allakkap uppersaatip naggataani makkua inissinneqartariaqarlutik ”... 551,4 mio. kr., ilanngunneqanngillat erniat, sillimmatit amma nammineq qinikkanut toqqaanissamut periarfissat...”)

**SIKUKI Nuuk Harbour A/S aamma Nuummi umiarsualiviliornissaq pillugu Inatsisartut inatsisissaattut siunnersuut.**

(Naalackersuisut Siulittaasuat, Kim Kielsen, Siumut)

**Saqqummiussissut**

(Naalackersuisut Siulittaasuat, Kim Kielsen, Siumut)

**Siullermeerneqarnera**

Nuummi umiarsualiviup allilerneqarnerani sanaartornermut immikkoortup aningaasalersuinerullu naapertuunnerusumik aaqqiissuunneqarnissaa siunertaralugu, Nuup umiarsualiviata sananeqarnissaanik ingerlanneqarnissaalu siunertaralugu aktiaatileqatigiiffimmik pilersitsinissaq pillugu UKA2013-imi Inatsisartut aalajangiiffigisassaat aalajangiiffigineqarpoq. Taamaattumik aktiaatileqatigiiffik SIKUKI Nuuk Harbour A/S 2013-imi decembarimi pilersinneqarpoq.

Naalackersuisut kingusinnerpaamik UPA2014-imi pilersitsinissamut sanaartornissamullu inatsimmik, ingerlatseqatigiiffiup siunertaanik aalajangersaaffiusumik saqqummiussinissamut UKA2013/18-p ataani peqquneqarpoq. Tamannali ajornarsimavoq arlalinnik peqquteqartumik ilaatigut qinersinissamik nalunaaruteqarnermik. Taamaattumik inatsisissatut siunnersuummik saqqummiussineq UPA2015-imi pivoq. Saqqummiussinerup aatsaat UPA2015-imi pinerata sunniuteqarnissaa naatsorsuutigineqanngilaq.

SIKUKI Nuuk Harbour A/S aktiaatileqatigiiffittut 100 mio. koruunit tikillugit aktiaatinik aningaasaateqartillugu pilersinneqarpoq. Aktiaatinik aningaasaatit aningaasaliinerit pisussat Nuummi umiarsualivimmi nutaami aningaasaliissutigineqartussat siunertaralugit

aalajangerneqarput, taamaalilluni taakkua akiitsoriligassanut naatsorsuutigineqartunut naleqquttumik naapertuullutik.

Ingerlatseqatigiiffiup siunertaa inatsimmi nassuiarneqarpoq, tassaasoq Nuummi umiarsualivimmik containerersorfiusumik nutaamik pilersaarusiornissaq, neqeroortitsinissaq aamma sanaartornissaq kiisalu Nuummi umiarsualivimmik pioreersumik aammalu nutaamik ingerlatsinissaq. Nuummi umiarsualivik allilerneqaruni umiarsuarnik anginerusunik sullissisinaanissamat inissaqartitsiviulissaaq, aammalu nunarput tamakkerlugu umiarsualivittut pingaarnertut atuutissalluni. Tamanna nunarput tamakkerlugu sunniuteqarluartumik sullissinissamat periarfissaqartitsilissaaq, tassami nunatsinnut nassiussat umiarsuarni anginerusuni, sukkanerusumik aammalu nalinginnaanerusumik kiisalu avatangiisinik mingutsitsinngitsumik assartorneqarsinnaalissapput. Nassiussat Nuummi umiarsuarnut umiarsualivinnut minnerusunut talinnissamat immikkut sananeqarsimasunut usilersuuteqqinneqarsinnaassapput. Taamaalilluni Nuummi umiarsualiviup nutaap pilersinneqarnera, Kalaallit Nunaannut, Kalaallit Nunaannit aamma Kalaallit Nunaata iluani usinik imaatigut angallassinerep, ingerlasussanik piareersaanerup aamma suliarinninnerup pitsannorsaavigineqarnerata ilaatut pissaaq. Aaqqiissutissaaq illoqarfinnik nunaqarfinnillu usinik nassiussanik pilersuinermi malugineqarsinnaassasoq naatsorsuutigineqarpoq.

Inatsimmi naatsorsuutigineqarpoq ingerlatseqatigiiffik ingerlatsinermini niuerneramik tunngaveqartumik ingerlassasoq, taamaalillunilu siunertaanngilaq ingerlatseqatigiiffik sapinngisamik annertunerpaamik piginnittumut sinneqartooruteqartitsisassasoq. Kisiannili naatsorsuutigineqarpoq ingerlatseqatigiiffik aningasartuutunik atorluaalluni ingerlanneqassasoq aammalu aningaasartuutit ineriartornerat ingerlaavartumik nalilersorneqartassasoq, taamaalilluni ingerlatseqatigiiffik patajaallisassalluni aammalu siunissami umiarsualivimmik ingerlatsinermini pitsaasumik patajaatsumillu tunngavissaqalissalluni.

Matumuuna paasissutissat kingulliit ilanngullugit takussutissiaq pilersaarummut sanilliullugu Inatsisartunut saqqummiunneqassaaq. Matumani oqaatigineqassaaq, SIKUKI Nuuk Harbour A/S-imit ingerlanneqarsimammata umiarsualiviliornissamit pilersaarusiornerep ingerlanneqarnera, niuernikkut pilersaarummit annertussutsimillu pissutsinut missingiuusianullu maannakkorpiaq pisunut naleqqussaasimaneq. Tamanna tunngavigalugu aningaasaqarnikkut naatsorsuutigisani pingaarutilinnik pitsannorsaait ingerlanneqarsimapput ilaatigut pilersaarummit naleqqussaannikkut ilaatigullu matuma nassatarisaanik aaqqiussuusaanermik naleqqussaasimaneq. Tamatuma kingunerisimavaa, naak ingerlatseqatigiiffimmit aatsitassarsiornerup tungaanit isertitassanik missingersuusiortoqarsimanngikkaluartoq naallu naatsorsuutigineqaaqqaarsimasumit assartukkatigut annertussutsit annikinnerusut missingersuusiorneqarsimagaluartut, taava peqatigitillugu iluatsinneqarsimavoq Royal Arctic Line A/S-imut ukiumoortumik attartornermut akiliutit ingerlatseqatigiiffimmik pilersitsinermi

naatsorsuutigineqaqqaarsimasuninngarnit 65%-ip missaannik annikinnerusumik missingersuusiorneqarsinnaasimaneri.

Pilersaarummit tunniussinerup kingorna Sikuki Nuuk Harbour A/S-imit naammassisinnaasat aamma ilusilernerqarsimanagera naatsorsuutigineqaqqaartumut sanilliullugit peqqissaartumik eqqarsaatigineqarsimapput. Naliliineq unaasimavoq unaallunilu, pilersaarutip annertussusianik annikillisisoqarsinnaasooq, atorsinnaassusia eqqunngikkaluarlugu umiarsualivimmullu pingaaruteqaqisumik logistikeqartitsinissaq (ingerlanneqartussamik piareersarnej aqutsinerlu). Peqatigitillugu arlalitsigut periarfissiisoqarsimavoq pitsaaneruserumik logistikkeqarnissaq aamma siunissami umiarsualiveqarfimmit illuutinillu annertusaasinnaanissamut eqaatsunik sinaakkusiisinnaanissaq. Tamakkiisumik isigalugu tamanna ima kinguneqarpoq:

- Umiarsualivik atorluarsinnaasooq umiarsualiveqarnissamik ingerlatsinermut pitsaasumik logistikkilik (ingerlanneqartussamik piareersarnej aqutsinertalik).
- Umiarsualivik illutaalu ingerlaavartumik ineriartortinneqarsinnaasut annertusisinneqarsinnaasullu pisariaqartitsisoqalissagaluarpat.
- Pilersaarummi sipaarutissat annertuut ilanngunneqarsimasut.

Sammininneq unaasimavoq sanaartortitsisut (entreprenørit) suliassamik kivitsisinnaasut akornanni naammagintumik unammillernermik pisoqarnissaata qulakkeerneqarnissaa, peqatigitillugu najukkami inuiaqatigiit iluaquserneqarlutik. Eqqarsaatiginnilluartoqareemat toqqarneqarpoq pilersaarutip Tamakkiisumik suliarinnittussarsiuussinissamut neqeroortigineqarnissaa. Unammillertoqarnissaanut aalajangiisartut ukuusimapput: akia, pitsaassuseq, misilittakkat, sulisinnaasunik kalaallinik atuineq kiisalu ilinniartunik (lærlingnik) atorfinitsitsineq siunertaralugu aningaasaqarnikkut pitsaanerpaamik neqerooruteqartoqarnissaata aalajangiusimaneqarnissaa.

Sulisinnaasunik kalaallinik ilinniartunillu atuinissaq eqqarsaatigalugu, pilersaarutip ingerlanneqarneranut atatillugu akunnerit atorneqartussat neqeroorfineqarsimapput. Akunnerit neqeroortigineqartut assersuutigalugu sulisinnaasunut ilinniagalinnut ilinniagaqanngitsunullu atorneqarsinnaapput, akunnernut siunnersuisumi atorneqartunut, sanaartorfiup allaffissornikkut isumagineqarneranut, ilinniartunut aamma ingeniørrinngorniarlutik misilitsittunut (praktikantinut). Tamakku sulisuussapput piffissami suliariumannittussarsiuussinerup nalaani Kalaallit Nunaanni najugaqarsimasut, sanaartortitsisuni, sanaartortitsisuni pingaanginnerusuni, siunnersortini il.il. Tamatumunnga ilaavoq akunnermut ataatsimut atorneqanngitsoortumut akiliisitsisoqartarnissaanik peqqusisoqarsimanagera. Nalilerneqarpoq, taamaasiornermut sanaartortitsisut tunuliaqutillit najukkami sulisinnaasunik atuinissamut annertuumik kajumissuseqartuussasut.

Pilersaarummit atortussat imatut ilusilersorneqarsimapput, Atorsinnaasutut neqeroortitut taaneqarsinnaallutik atorsinnaassutsinut arlalinnut piumasaqaatitalittut aamma sanaartortitsisumut qinersisinnaanermik periarfissalittut. Taamaasiornikkut neqerooruteqartut pilersaarummit sapinngisamik annertunerpaamik piumasaqaatit suunerinut sanilliullugit pitsaanerpaanngortitsisinnaalersillugit. Taamaasiornikkut nalilerneqarpoq tunisassioriaatsit

sanaartoriaatsillu nassaarineqarsimassasut, pitsaassutsimik sunniingikkaluarlutik pisariitsut. Nalilerneqarpoq, atorsinnaasutut neqeroorutip kingunerisimassagaa aningaasartuutit annertuumik killilersimaarsimasinnaanerat.

Tamakkiisumik isigalugu tamanna ima kinguneqarpoq:

- Erniat ilanngunnagit kisiannili sanaartugaq, illuutit, atortulersuutit, kranit (kivittaatit) nikisinneqarsinnaasut, pilersaarusiormi aningaasartuutit aamma naatsorsuutigingisamik aningaasartuutit ilanngullugit katillugit sanaartornermut aningaasat 551,4 mio. kronit, ilanngunneqanngillat erniat, sillimmatit amma nammineq qinikkanut toqqaanissamut periarfissat taakkulu naatsorsuutigeqqaakkaminngarnit 100 mio. kronit missaannik annikinnerupput.
- Sulisinnaasunik ilinniartunillu annertuumik atuineq, taakku najukkami sulisinnaasunik piginnaasatigut ingerlatseqatigiiffinnillu qaffasaanerup qaavatigut aamma inuiaqatigiinni siuariartornermik pilersitsisoq. Neqeroorutigineqarsimapput pilersaarummi kalaallinik sulisinnaasunik akunnernik 130.000-inik atuisinnaanissaq kiisalu ilinniartunut akunnernik 20.000-inik. Tamakku ataatsimut katillugit amerlaqatigaat ukiumi ataatsimi ulloq naallugu sulisinnaasutut atorfiit 90-it missaat, taakkunungalugu ilanngunneqarsinnaapput kiffartuussinikkut ingerlatseqatigiiffinni, piginnaangorsaanerni il.il. kingunerisinnaasatut sunniutit.

Taamatut oqaaseqarlunga saqqummiussissut Inatsisartuni kajumissaarnartumik suliarineqarnissaanut tunniuppara.